

COLUMNA

Quant custas ti?

 AITA DERMONT-STUPAN

Adina cur che jau sun vi da tatgar en marchinas dal Volg stoss jau patratgar als pleds da mes conscolar. Durant noss'emprima scuntrada da classa, diesch onns suenter il diplom, aveva el numnadamain raquintà da ses success cun sia firma da management, e ch'el haja bainbaud stuì engaschar ina secretaria, «...perquai che jau cust memia bler per tagar si marcas».

Questa frasa ha mess en moviment tut ils segns da dumonda en mes tscharvè. Enfin là n'aveva jau mai patratgà che l'uman pudess avair er ina valur monetara. Mes conscolar aveva lura motivà che quels che sajan abels da far lavur pretensiusa e da gronda responsabladad duajan sa concentrar sin quella e betg prender davent ad auters la lavur simpla. Uschia genereschian ins eba plazzas da lavur ed ins vegnia vinavant.

Hm, tantenant anc logic e perfin social. Jau n'hai quel mument betg dumandà quant che sia secretaria custa pia. Nus vulevan gea passentar ina saira allegra e betg ans stgarplinar vi e nà puspè.



Ma quest patratg, tgi che custa quant per far tge, m'ha fatschentada adina vinavant. Saja quai fasschend stim da las relaziuns da lavur en general, ma cunzunt er reflectond davart mia situaziun da lavur: Quant cust jau? Lavur jau forsia sut pretsch? U forsia sut mes niveau? Lavur jau avunda per mia paja? Tge sun jau abla da far? Stuess jau surpigliar dapli responsabladad u lavurar dapli? Prender davent la lavur ad auters na vuess jau tuttavia betg. Tge lavur ma plascha insumma da far?

Jau lavur gugent concentradamain vi dad ina chaussa, magari er ensemen cun autras persunas, sun abla da surpigliar ina tscherta responsabladad, sch'i fa basegn. Ma il pli cuntenta

sun jau cun far lavurs meditativas sco - tatgar en marcas, per exempel, u cun raschlar, zerclar u emplunar laina, u er cun far giu la pulvra e pulir, pender si la laschiva.... Ti fas e fas, senza patratgar, – na, apunta betg – ti fas e patratgas da tuttas sorts latiers. Patratgas e reflecteschas, er sche ti na sas conscientamain gnanc nua che tes patratgs van a spass. Ti fas e fas e tuttenina stas davant la lavur fatga. Tge bel mument! E ti has patratgà insatge. Cur ch'il mument è lura qua, ta regordas dal patratg ed i ta vegnan las meglras ideas! Lura pos ir cun schlantsch vi da la lavur pretensiusa e las realisar.

Tranteren studegel jau co ch'i fiss, sche las uschenumnadas «vairamain impurtantas persunas», las VIP, fasschessan er sezzas lur crom? E co ch'i fiss, sche tut la glieud custass tuttina pauc? Forsa vessan las persunas VIP lura er dapli temp da patratgar. Cler che nus na fissan lura betg uschè «vinavant», ma sur il stritg valess forsia tut in pau dapli.

Aita Dermont-Stupan tira la renta e fa tge ch'i para e plascha cun «patratgar da tuttas sorts latiers».